

Här Fernand Etgen
President vun der Deputéiertechamber
19, um Krautmaart
L-1728 Lëtzebuerg

Lëtzebuerg, den 22. Abrëll 2021

Här President,

esou wéi d'Chamberreglement et virgesäit, biede mir Iech, dës parlamentaresch Fro un den Här Wirtschaftsminister, un den Här Premierminister a Minister fir Digitaliséierung, un d'Madamm Justizminister an un d'Madamm Minister fir d'Gesondheet a fir de Konsumenteschutz weiderzeleeden.

Op verschiddene Fluchhäfe muss e Reesenden haut net méi just säi Fluchticket a säi Pass oder seng Carte d'identité weisen, mee och en negative Coronatest oder en Impfnoweis. Dëst kënn dohier, datt verschidde Länner eng Testpflicht festgeluecht hunn oder well vill Fluchgesellschaften nëmme geimpften oder negativ geteste Leit mathuelen.

Zesumme mat 20 Fluchgesellschaften ass de Weltverband vun de Fluchgesellschaften (IATA) amgaangen de sougenannten „Travel Pass“ ze testen, eng Smartphone-App déi den aktuelle giele pabeiersen Impfpass soll ersetzen. Dëst ass och net déi eenzeg Impfpass-App, déi am Zesammenhang mat der Covid-Impfung entwéckelt gëtt.

An deem Kontext wéilte mir der Regierung gär folgend Froe stellen:


1. Ass d'Regierung a Kenntnes iwwert dës Entwécklung? Wéi steet d'Regierung dozou, datt elo Privatgesellschaften hir eegen Impfpass-Appen entwéckelen? Ass eng Lëtzebuerger Fluchgesellschaft oder d'Fluchhafegesellschaft un esou Entwécklung mat bedeelegt? Gëtt et fir esou Entwécklungen eng legal Basis, respektiv wat wier de Wäert vun esou enger Impfpass-App aus rechtlecher Siicht?
2. Wat ass de Grond fir esou eng Initiativ, wou jo d'Staats- a Regierungschef vum der Europäescher Unioun uitgemaach haten, d'Pläng fir en digitalen Impfpass virunzedreiwen? Wou sinn dës Entwécklungen drun?
3. D'WHO hat sech allgemeng géint eng Impfpass-App ausgeschwat mat der Begrënnung, datt net gewosst wier, wéi laang eng Immunitéit unhale géing a well d'Impfung och net onbedéngt d'Ustieche vun anere Mënsche verhënnere géing. Wéi steet d'Regierung dozou? Ass si der Meenung, datt

esou eng Impfpass-App, nieft engem europäeschen Impfpass, sënnvoll an néideg ass?

4. Huet d'Regierung an dësem Kontext scho mat Fluchgesellschaften, dem Konsumenteschutz, Dateschutzorganisatiounen, der Organisatiounen aus dem medezineschen Ëmfeld an/oder mat nach aneren intresséierte Gesprächspartner Kontakt gehat? Wa jo, mat wem a mat wéi enge Resultater?
5. Ass d'Regierung der Meenung, datt de Konsument virun enger Multiplikatioun vun Appen an engem esou kriddelege Beräich, wou den Dateschutz, de Secret médical oder d'Perséinlechkeetsrechter liicht kënne verletzt ginn, muss geschützt ginn?
6. Wéi kann de Fluchpassagéier d'Sécherheet vun dëser App an den Zougrëff, dee si op perséinlech Donnéeën um Smartphone huet, kontrolléieren?
7. Ass d'Regierung der Meenung, datt d'Aféiere vun esou Appen, déi d'néideg Technologie an d'Fäegkeet domat ëmzegoen, viraussetzen, sozial Ongerechtegkeeten an Diskriminatioune fërderen? Wat ass mat Leit, déi kee Smartphone hunn a wëllen, mussen déi op esou Déngschtleschtunge verzichten?
8. Wéi ass dës Demarche ze verrieden a Bezuch op de Schutz vu perséinlechen Daten a vum Secret médical, besonnesch wann ee bedenkt, datt hei privat Entreprises Zougrëff op streng geschützte perséinlech Donnéeë wëlle kréien? Kann dat e Präzedenzfall fir aner Erkrankungen ginn, esou datt krank oder och nëmmen infizéiert Leit an Zukunft manner Déngschtleschtunge kéinte kréien?
9. Huet d'Regierung vir, op dës Entwécklungen ze reagéieren? Wéi wëllt d'Regierung d'Aféierung vun esou Appen duerch Privatgesellschafte kontrolléieren, reguléieren oder och verhënneren?

Mat déiwem Respekt,

Roy Reding
Deputéierten



Jeff Engelen
Deputéierten

